

«Alerts» – cudesch da l'onn 2010

Nov med d'instrucziun per rumantsch grischun vegn premià

DA MARTIN CABALZAR

■ Il nov med d'instrucziun rumantsch «Alerts» è vegnì tschernì dal publicum sco «Cudesch grischun 2010» edì da la Chasa editura per meds didactics dal Grischun. Ord ina retscha da 26 publicaziuns cumparidas en ina chasa editura dal Grischun u che stattan tematicain en connex cun il Grischun. Durant duas emnas ha il publicum gè l'ocasiun da prender in vista da las publicaziuns novas en las localitads da la Biblioteca chantunala a Cuir. La tscherna dal cudesch da l'onn vegn organisada mintg'onn da l'Unìun grischuna d'editurs «Cudeschs ord il Grischun» che è vegnida fundada 1991 e che dumbra actualmain 15 commembers.

«Alerts» – cudesch da lingua per la terza classa primara

Il Cudesch grischun 2010 è il med d'instrucziun «Alerts» che è vegnì redegì d'in team d'auturas ed auturs ed è destinà per l'in-



Joy Künzler, la manadra da la Chasa editura da meds d'instrucziun dal Grischun, preschenta cun luschezza il cudesch victur.

FOTO M. HARTMANN

strucziun da rumantsch grischun en la terza classa primara. «Exemplarics èn quests cudeschs cunzunt perquai ch'els cumpeglian sper il cudesch graphicain plaschaivel e bain illustrà era fegls da lavur ed in disc cumpact facilitond uschia ina intermediaziun integrala da la lingua», ha ditg il pursura dals editurs grischuns *Stefan Bühler*.

Dus ulteriurs premis

Sin il segund plaz chattain nus la publicaziun bilingua e bain illustrada «Bernina Express» che l'editura AS ha edì per il giubileum da 100 onns da la Viafier dal Bernina. Sin plaz trais dals cudeschs premiads sa chatta il cudesch «Himmelsleiter und Fel-sentherme». Editurs da quest guid d'architectura èn *Köbi Gantenbein, Marco Guetg e Ralph Feiner*. Cumpari è il cudesch tar la chasa editura Rotpunkt sco segunda ediziun actualisada che cuntegn purtrets, maletgs e plans da 65 «perlas» da l'architectura contemporanea en il Grischun.